

REGLUGERÐ

um breytingu á reglugerð nr. 588/1993 um merkingu, auglýsingu og kynningu matvæla sbr. breytingar nr. 142/1995 og nr. 726/1997.

1. gr.

2. mgr. 12. gr. orðast svo:

Ef merking matvæla gefur til kynna magn eða undirstrikar mikilvægi eins eða fleiri innihaldsefna, eða ef ákvæðin innihaldsefni eru venjulega tengd heiti matvæla, þá á magn þeirra að koma fram í tengslum við heiti vörunnar eða í innihaldslýsingu. Magn innihaldsefna skal gefið upp í prósentum eins og það er notað við framleiðslu vörunnar, nema annað sé ákvæðið, sbr. 25. grein.

2. gr.

Við 3. mgr. 12. gr. bætist 6. og 7. liður sem orðast svo:

6. Innihaldsefni eru sætuefni og merkingin „Með sætuefni“ eða „Með sykri og sætuefni“ kemur fram í tengslum við heiti vörunnar sbr. 2. mgr. 13. greinar.
7. Um er að ræða íblöndun bætiefna og upplýsingar um næringargildi koma fram á umbúðum sbr. 9. gr. reglugerðar nr. 488/1993 um merkingu næringargildis matvæla.

3. gr.

25. gr. orðast svo:

Þrátt fyrir ákvæði 2. mgr. 12. gr. og 1. mgr. 24. gr. skal skrá vatn og rokgjörn efnasambönd, sem notuð eru við framleiðslu, í innihaldslýsingu miðað við þyngd í lokaafurð. Það sama á við þegar krafa er gerð um magnmerkingu þessara efna. Vatnsinnihald skal þá reiknað með því að draga þyngd annarra innihaldsefna frá heildarþyngd lokaafurðar. Ef vatn reynist undir 5% af nettóþyngd vörunnar er ekki skylt að tilgreina það í innihaldslýsingu.

Ekki þarf að tilgreina vatnsinnihald í innihaldslýsingu þegar vatnið er notað í framleiðsluferlinu einungis til þynningar eða uppleysingar á innihaldi sem notað er í þykktu eða þurrkuðu formi, né heldur ef vatnið er hluti af legi sem ekki er ætlaður til neyslu að öllu jöfnu (sykurlausn, saltvatn o.þ.h.).

Þegar krafa er gerð um magnmerkingu innihaldsefna og þau tapa vatni við framleiðslu, skal gefa upp magn sem notað er við framleiðslu sem hlutfall af þyngd lokaafurðar. Magnið skal gefa upp í prósentum. Ef uppgefið magn innihaldsefna fer yfir 100% miðað við lokaafurð, skal í stað prósentutölu gefa upp það magn innihaldsefna sem þarf til að framleiða 100 g af vörunni.

Þegar notuð eru þurrkuð eða þykkt innihaldsefni sem við framleiðslu eða meðhöndlun fá sína upphaflegu mynd, má gefa upp magn efnanna á því formi.

4. gr.

Reglugerð þessi er sett með stöð í 2. mgr. 15. gr. laga nr. 93/1995 um matvæli. Einnig var höfð hliðsjón af ákvæðum samningsins um Evrópska efnahagssvæðið, sem vísað er til í XII. kafla, II. viðauka, tilskipun 97/4/EB og tilskipun 1999/10/EB.

Reglugerðin öðlast þegar gildi.

Ákvæði til bráðabirgða.

Breytingu á umbúðamerkingum vegna ákvæða þessarar reglugerðar skal lokið fyrir 14. febrúar 2000. Þrátt fyrir framangreinda dagsetningu er heimilt að selja birgðir af vöru sem framleidd hefur verið og merkt fyrir þann tíma samkvæmt áður gildandi reglum.

Umhverfisstjórnun, 25. janúar 2000.

Siv Friðleifsdóttir.

Ingimar Sigurðsson.

Nr. 55

7. janúar 2000

REGLUR

um ársreikninga lífeyrissjóða.

I. KAFLI

Gildissvið.

1. gr.

Reglur þessar gilda um lífeyrissjóði sem starfa á grundvelli laga nr. 129/1997 og samkvæmt sérstökum lögum.

II. KAFLI

Almenn ákvæði.

2. gr.

Ársreikning skal semja fyrir hvert reikningsár. Einnig skal semja skýrslu stjórnar sem ásamt ársreikningi myndar eina heild. Ársreikningur skal hafa að geyma yfirlit um breytingu á hreinni eign til greiðslu lífeyris, efnahagsreikning, sjóðstreymi og skýringar. Lífeyrissjóður sem starfar í fjárhagslega aðskildum deildum skal sýna sérgreind yfirlit um breytingu á hreinni eign til greiðslu lífeyris, efnahagsreikning, sjóðstreymi og skýringar.

Ákvæði reglna þessara gilda um samstæðureikning eftir því sem við getur átt. Í móðurfélagi skal semja samstæðureikning. Samstæðureikningur skal hafa að geyma skýrslu stjórnar, rekstrarreikning, efnahagsreikning, sjóðstreymi og skýringar.

3. gr.

Ársreikningur og samstæðureikningur skulu gerðir í samræmi við lög, reglur og góða reikningsskilavenju og gefa glögga mynd af breytingu á hreinni eign til greiðslu lífeyris á reikningsárinu og efnahag í lok þess. Nægi ákvæði laga eða góð reikningsskilavenja ekki til að gefa glögga mynd af breytingu á hreinni eign til greiðslu lífeyris og efnahag skal veita frekari upplýsingar í skýringum.

Ársreikningur skal settur upp með hliðstæðum hætti frá ári til árs nema sérstakar aðstæður gefi tilefni til annars. Breytingar skulu tilgreindar og rökstuddar í skýringum.

4. gr.

Ársreikningurinn skal gerður í því formi sem fyrir er mælt í viðauka I, sem er hluti af þessum reglum, og skal heiti liða og röð þeirra vera eins og þar segir.

Sameina má liði er nema óverulegum fjárhæðum öðrum liðum.

Frekari greiningu má gera undir einstökum liðum sé það nauðsynlegt til að gera reikningsskilin gleggri og að því tilskildu að heiti tilgreindra liða sé ekki breytt né röð þeirra.